

Galatiyoñ

¹ Yih khat Paulus rasul kī taraf se hai. Mujhe na kisī guroh ne muqarrar kiyā na kisī shaḳhs ne balki Īsā Masīh aur Ḳhudā Bāp ne jis ne use murdoñ meñ se zindā kar diyā. ² Tamām bhāi bhī jo mere sāth haiñ Galatiyā kī jamātoñ ko salām kahte haiñ.

³ Ḳhudā hamārā Bāp aur Ḳhudāwand Īsā Masīh āp ko fazl aur salāmatī atā karen.

⁴ Masīh wuhī hai jis ne apne āp ko hamāre gunāhoñ kī ḳhātir qurbān kar diyā aur yoñ hameñ is maujūdā sharīr jahān se bachā liyā hai, kyonki yih Allāh hamāre Bāp kī marzī thī. ⁵ Usī kā jalāl abad tak hotā rahe! Āmīn.

Ek hī Ḳhushḳhabrī

⁶ Maiñ hairān hūñ! Āp itnī jaldī se use tark kar rahe haiñ jis ne Masīh ke fazl se āp ko bulāyā. Aur ab āp ek farq qism kī “Ḳhushḳhabrī” ke pīchhe lag gae haiñ. ⁷ Asal meñ yih Allāh kī ḳhushḳhabrī hai nahīñ. Bas kuchh log āp ko uljhan meñ ḍāl kar Masīh kī ḳhushḳhabrī meñ tabdīlī lānā chāhte haiñ. ⁸ Ham ne to asli ḳhushḳhabrī sunāi aur jo is se farq paighām sunātā hai us par lānat, ḳhāh ham ḳhud aisā karen ḳhāh āsmān se koī farishtā utar kar yih ḡhalat paighām sunāe. ⁹ Ham yih pahle bayān kar chuke haiñ aur ab maiñ dubārā kahtā hūñ ki agar koī āp ko aisī “Ḳhushḳhabrī” sunāe jo us se farq hai jise āp ne qabūl kiyā hai to us par lānat!

¹⁰ Kyā main is meñ yih koshish kar rahā hūn ki log mujhe qabūl karen? Hargiz nahīn! Main chāhtā hūn ki Allāh mujhe qabūl kare. Kyā merī koshish yih hai ki main logoñ ko pasand āūn? Agar main ab tak aisā kartā to Masīh kā kḥādim na hotā.

Paulus Kis Tarah Rasūl Ban Gayā

¹¹ Bhāiyo, main chāhtā hūn ki āp jān leñ ki jo kḥushkhabrī main ne sunāi wuh insān kī taraf se nahīn hai. ¹² Na mujhe yih paighām kisī insān se milā, na yih mujhe kisī ne sikhāyā hai balki Isā Masīh ne kḥud mujh par yih paighām zāhir kiyā.

¹³ Āp ne to kḥud sun liyā hai ki main us waqt kis tarah zindagī guzartā thā jab Yahūdī mazhab kā pairokār thā. Us waqt main ne kitne josh aur shiddat se Allāh kī jamāt ko īzā pahuñchāi. Merī pūrī koshish yih thī ki yih jamāt kḥatm ho jāe. ¹⁴ Yahūdī mazhab ke lihāz se main aksar dīgar hamumr Yahūdiyoñ par sabqat le gayā thā. Hāñ, main apne bāpdādā kī riwāyatoñ kī pairawī meñ had se zyādā sargarm thā.

¹⁵ Lekin Allāh ne apne fazl se mujhe paidā hone se peshtar hī chun kar apnī kḥidmat karne ke lie bulāyā. Aur jab us ne apnī marzī se ¹⁶ apne Farzand ko mujh par zāhir kiyā tāki main us ke bāre meñ Ghairyahūdiyoñ ko kḥushkhabrī sunāūn to main ne kisī bhī shaḥs se mashwarā na liyā. ¹⁷ Us waqt main Yarūshalam bhī na gayā tāki un se milūn jo mujh se pahle rasūl the balki main sīdhā Arab chalā gayā aur bād meñ Damishq wāpas āyā. ¹⁸ Is ke tīn sāl bād hī main

Patras se shanāsā hone ke lie Yarūshalam gayā. Wahān main pandrah din us ke sāth rahā. ¹⁹ Is ke alāwā main ne sirf Ḳhudāwand ke bhāi Yāqūb ko dekhā, kisī aur rasūl ko nahīn.

²⁰ Jo kuchh main likh rahā hūn Allāh gawāh hai ki wuh sahīh hai. Main jhūṭ nahīn bol rahā.

²¹ Bād meñ main Mulk-e-Shām aur Kilikiyā chalā gayā. ²² Us waqt sūbā Yahūdiyā meñ Masīh kī jamāteñ mujhe nahīn jāntī thīn. ²³ Un tak sirf yih ḳhabar pahuñchī thī ki jo ādmī pahle hameñ izā pahuñchā rahā thā wuh ab ḳhud us imān kī ḳhushḳhabrī sunātā hai jise wuh pahle ḳhatm karnā chāhtā thā. ²⁴ Yih sun kar unhoñ ne merī wajah se Allāh kī tamjīd kī.

2

Paulus aur Dīgar Rasūl

¹ Chaudah sāl ke bād main dubārā Yarūshalam gayā. Is dafā Barnabās sāth thā. Main Titus ko bhī sāth le kar gayā. ² Main ek mukāshafe kī wajah se gayā jo Allāh ne mujh par zāhir kiyā thā. Merī alahdagī meñ un ke sāth mīṭing huī jo asar-o-rasūḳh rakhte haiñ. Is meñ main ne unheñ wuh ḳhushḳhabrī pesh kī jo main Ḡhairyahūdiyoñ ko sunātā hūn. Main nahīn chāhtā thā ki jo dauṛ main dauṛ rahā hūn yā mazī meñ dauṛā thā wuh āḳhirkār befāyda nikle. ³ Us waqt wuh yahān tak mere haq meñ the ki unhoñ ne Titus ko bhī apnā ḳhatnā karwāne par majbūr nahīn kiyā, agarche wuh Ḡhairyahūdī hai. ⁴ Aur chand yihī chāhte the. Lekin yih jhūṭe bhāi the jo chupke se andar ghus

āe the tāki jāsūs ban kar hamārī us āzādī ke bāre meñ mālūmāt hāsil kar leñ jo hameñ Masīh meñ milī hai. Yih hameñ ghulām banānā chāhte the, ⁵ lekin ham ne lamhā-bhar un kī bāt na mānī aur na un ke tābe hue tāki Allāh kī khushkhabrī kī sachchāī āp ke darmiyān qāym rahe.

⁶ Aur jo rāhnumā samjhe jāte the unhoñ ne merī bāt meñ koī izāfā na kiyā. (Asl meñ mujhe koī parwā nahīn ki un kā asar-o-rasūkh thā ki nahīn. Allāh to insān kī zāhirī hālat kā lihāz nahīn kartā.) ⁷ Baharhāl unhoñ ne dekhā ki Allāh ne mujhe Ghairyahūdiyoñ ko Masīh kī khushkhabrī sunāne kī zimmedārī dī thī, bilkul usī tarah jis tarah us ne Patras ko Yahūdiyoñ ko yih paighām sunāne kī zimmedārī dī thī. ⁸ Kyoñki jo kām Allāh Yahūdiyoñ ke rasūl Patras kī khidmat ke wasīle se kar rahā thā wuhī kām wuh mere wasīle se bhī kar rahā thā, jo Ghairyahūdiyoñ kā rasūl hūn. ⁹ Yāqūb, Patras aur Yūhannā ko jamāt ke satūn mānā jātā thā. Jab unhoñ ne jān liyā ki Allāh ne is nāte se mujhe khās fazl diyā hai to unhoñ ne mujh se aur Barnabās se dahnā hāth milā kar is kā izhār kiyā ki wuh hamāre sāth haiñ. Yoñ ham muttafiq hue ki Barnabās aur maiñ Ghairyahūdiyoñ meñ khidmat karenge aur wuh Yahūdiyoñ meñ. ¹⁰ Unhoñ ne sirf ek bāt par zor diyā ki ham zarūratmandoñ ko yād rakheñ, wuhī bāt jise maiñ hameshā karne ke lie koshān rahā hūn.

Antākiyā meñ Paulus Patras ko Malāmat Kartā Hai

¹¹ Lekin jab Patras Antākiyā Shahr āyā to main ne rūbarū us kī muḵhālafat kī, kyonki wuh apne rawaiye ke sabab se mujrim ṭhahrā. ¹² Jab wuh āyā to pahle wuh Ġhairyahūdī īmāndāroṅ ke sāth khānā khātā rahā. Lekin phir Yāqūb ke kuchh azīz āe. Usī waqt Patras pīchhe haṭ kar Ġhairyahūdiyoṅ se alag huā, kyonki wuh un se ḍartā thā jo Ġhairyahūdiyoṅ kā khatnā karwāne ke haq meṅ the. ¹³ Bāqī Yahūdī bhī is riyākārī meṅ shāmil hue, yahān tak ki Barnabās ko bhī un kī riyākārī se bahkāyā gayā. ¹⁴ Jab main ne dekhā ki wuh us sīdhī rāh par nahīn chal rahe haiṅ jo Allāh kī khushkhabrī kī sachchāi par mabnī hai to main ne sab ke sāmṇe Patras se kahā, “Āp Yahūdī haiṅ. Lekin āp Ġhairyahūdī kī tarah zindagī guzār rahe haiṅ, Yahūdī kī tarah nahīn. To phir yih kaisī bāt hai ki āp Ġhairyahūdiyoṅ ko Yahūdī riwāyāt kī pairawī karne par majbūr kar rahe haiṅ?”

Sab Īmān se Najāt Pāte Haiṅ

¹⁵ Beshak ham paidāishī Yahūdī haiṅ aur ‘Ġhairyahūdī gunāhgār’ nahīn haiṅ. ¹⁶ Lekin ham jānte haiṅ ki insān ko shariyat kī pairawī karne se rāstbāz nahīn ṭhahrāyā jātā balki Īsā Masīh par īmān lāne se. Ham bhī Masīh Īsā par īmān lāe haiṅ tāki hamen rāstbāz qarār diyā jāe, shariyat kī pairawī karne se nahīn balki Masīh par īmān lāne se. Kyonki shariyat kī pairawī karne se kisī ko bhī rāstbāz qarār nahīn diyā jāegā. ¹⁷ Lekin agar Masīh meṅ rāstbāz ṭhaharne kī koshish karte karte ham

ḳhud gunāhgār sābit ho jāēñ to kyā is kā matlab yih hai ki Masīh gunāh kā ḳhādim hai? Hargiz nahīñ! ¹⁸ Agar maiñ shariyat ke us nizām ko dubārā tāmīr karūñ jo maiñ ne ḍhā diyā to phir maiñ zāhir kartā hūñ ki maiñ mujrim hūñ. ¹⁹ Kyoñki jahāñ tak shariyat kā tālluq hai maiñ murdā hūñ. Mujhe shariyat hī se mārā gayā hai tāki Allāh ke lie jī sakūñ. Mujhe Masīh ke sāth maslūb kiyā gayā ²⁰ aur yoñ maiñ ḳhud zindā na rahā balki Masīh mujh meñ zindā hai. Ab jo zindagī maiñ is jism meñ guzārtā hūñ wuh Allāh ke Farzand par imān lāne se guzārtā hūñ. Usī ne mujh se muhabbat rakh kar mere lie apnī jāñ dī. ²¹ Maiñ Allāh kā fazl radd karne se inkār kartā hūñ. Kyoñki agar kisī ko shariyat kī pairawī karne se rāstbāz ṭhahrāyā jā saktā to is kā matlab yih hotā ki Masīh kā marnā abas thā.

3

Sharīyat yā Imān

¹ Nāsamajh Galatiyo! Kis ne āp par jādū kar diyā? Āp kī āñkhoñ ke sāmne hī Īsā Masīh aur us kī salībī maut ko sāf sāf pesh kiyā gayā. ² Mujhe ek bāt bataēñ, kyā āp ko shariyat kī pairawī karne se Rūhul-quds milā? Hargiz nahīñ! Wuh āp ko us waqt milā jab āp Masīh ke bāre meñ paighām sun kar us par imān lāe. ³ Kyā āp itne besamajh haiñ? Āp kī ruhānī zindagī Rūhul-quds ke wasīle se shurū huī. To ab āp yih kām apnī insānī koshishoñ se kis tarah takmīl tak pahuñchānā chāhte haiñ? ⁴ Āp ko kaī tarah ke tajrabe hāsil hue haiñ. Kyā yih sab befāyda the?

Yaḳīnan yih befāydā nahīn the. ⁵ Kyā Allāh is lie āp ko apnā Rūh detā aur āp ke darmiyān mojize kartā hai ki āp shariyat kī pairawī karte haiñ? Hargiz nahīn, balki is lie ki āp Masīh ke bāre meñ paighām sun kar imān lāe haiñ.

⁶ Ibrāhīm kī misāl leñ. Us ne Allāh par bharosā kiyā aur is binā par Allāh ne use rāstbāz qarār diyā. ⁷ To phir āp ko jān lenā chāhie ki Ibrāhīm kī haqīqī aulād wuh log haiñ jo imān rakhte haiñ. ⁸ Kalām-e-muqaddas ne is bāt kī peshgoī kī ki Allāh Ġhairyahūdiyoñ ko imān ke zariye rāstbāz qarār degā. Yoñ us ne Ibrāhīm ko yih ḳhushḳhabrī sunāi, “Tamām qaumeñ tujh se barkat pāeñgī.” ⁹ Ibrāhīm imān lāyā, is lie use barkat milī. Isī tarah sab ko imān lāne par Ibrāhīm kī-sī barkat miltī hai.

¹⁰ Lekin jo bhī is par takiyā karte haiñ ki hameñ shariyat kī pairawī karne se rāstbāz qarār diyā jāegā un par Allāh kī lānat hai. Kyoñki kalām-e-muqaddas farmātā hai, “Har ek par lānat jo Shariyat kī Kitāb kī tamām bāteñ qāym na rakhe, na in par amal kare.” ¹¹ Yih bāt to sāf hai ki Allāh kisī ko bhī shariyat kī pairawī karne kī binā par rāstbāz nahīn ṭhahrātā, kyoñki kalām-e-muqaddas ke mutābiq rāstbāz imān hī se jītā rahegā. ¹² Imān kī yih rāh shariyat kī rāh se bilkul farq hai jo kahtī hai, “Jo yoñ karegā wuh jītā rahegā.”

¹³ Lekin Masīh ne hamārā fidyā de kar hameñ shariyat kī lānat se āzād kar diyā hai. Yih us ne is tarah kiyā ki wuh hamārī ḳhātir ḳhud lānat banā. Kyoñki kalām-e-muqaddas meñ likhā hai,

“Jise bhī darakht se laṭkāyā gayā hai us par Allāh kī lānat hai.” ¹⁴ Is kā maqsad yih thā ki jo barkat Ibrāhīm ko hāsil huī wuh Masīh ke wasīle se Ghairyahūdiyoṅ ko bhī mile aur yoṅ ham īmān lā kar wādā kiyā huā Rūh pāen.

Sharīat aur Wādā

¹⁵ Bhāiyo, insānī zindagī kī ek misāl len. Jab do pārtiyān kisī muāmle meṅ muttafiq ho kar muāhadā kartī haiṅ to koī is muāhade ko mansūkh yā is meṅ izāfā nahīn kar saktā. ¹⁶ Ab ghaur karen ki Allāh ne apne wāde Ibrāhīm aur us kī aulād se hī kie. Lekin jo lafz Ibrānī meṅ aulād ke lie istemāl huā hai is se murād bahut-se afrād nahīn balki ek fard hai aur wuh hai Masīh. ¹⁷ Kahne se murād yih hai ki Allāh ne Ibrāhīm se ahd bāndh kar use qāym rakhne kā wādā kiyā. Sharīat jo 430 sāl ke bād dī gai is ahd ko radd karke Allāh kā wādā mansūkh nahīn kar saktī. ¹⁸ Kyonki agar Ibrāhīm kī mīrās sharīat kī pairawī karne se miltī to phir wuh Allāh ke wāde par munhasir na hotī. Lekin aisā nahīn thā. Allāh ne ise apne wāde kī binā par Ibrāhīm ko de diyā.

¹⁹ To phir sharīat kā kyā maqsad thā? Use is lie wāde ke alāwā diyā gayā tāki logoṅ ke gunāhoṅ ko zāhir kare. Aur use us waqt tak qāym rahnā thā jab tak Ibrāhīm kī wuh aulād na ā jātī jis se wādā kiyā gayā thā. Allāh ne apnī sharīat farishtoṅ ke wasīle se Mūsā ko de dī jo Allāh aur logoṅ ke bīch meṅ darmiyānī rahā. ²⁰ Ab darmiyānī us waqt zarūrī hotā hai jab ek se zyādā pārtiyōṅ meṅ ittafaq karāne kī zarūrat

hai. Lekin Allāh jo ek hī hai us ne darmiyānī istemāl na kiyā jab us ne Ibrāhīm se wādā kiyā.

Sharīat kā Maqsad

²¹ To kyā is kā matlab yih hai ki sharīat Allāh ke wādoñ ke ḳhilāf hai? Hargiz nahīn! Agar insān ko aisī sharīat milī hotī jo zindagī dilā saktī to phir sab us kī pairawī karne se rāstbāz ṭhaharte. ²² Lekin kalām-e-muḳaddas farmātā hai ki pūrī duniyā gunāh ke ḳabze meñ hai. Chunānche hameñ Allāh kā wādā sirf Īsā Masīh par imān lāne se hāsīl hotā hai.

²³ Is se pahle ki imān kī yih rāh dastyāb huī sharīat ne hameñ qaid karke mahfūz rakhā thā. Is qaid meñ ham us waqt tak rahe jab tak imān kī rāh zāhir nahīn huī thī. ²⁴ Yoñ sharīat ko hamārī tarbiyat karne kī zimmedārī dī gāī. Use hameñ Masīh tak pahuñchānā thā tāki hameñ imān se rāstbāz qarār diyā jāe. ²⁵ Ab chūñki imān kī rāh ā gāī hai is lie ham sharīat kī tarbiyat ke taht nahīn rahe.

²⁶ Kyoñki Masīh Īsā par imān lāne se āp sab Allāh ke farzand ban gae haiñ. ²⁷ Āp meñ se jītnoñ ko Masīh meñ baptismā diyā gayā unhoñ ne Masīh ko pahan liyā. ²⁸ Ab na Yahūdī rahā na Ġhairyahūdī, na ḡhulām rahā na āzād, na mard rahā na aurat. Masīh Īsā meñ āp sab ke sab ek haiñ. ²⁹ Shart yih hai ki āp Masīh ke hoñ. Tab āp Ibrāhīm kī aulād aur un chīzoñ ke wāris haiñ jin kā wādā Allāh ne kiyā hai.

4

¹ Dekheñ, jo beṭā apne bāp kī milkiyat kā wāris hai wuh us waqt tak ḡhulāmoñ se farq nahīñ jab tak wuh bāligh na ho, hālāñki wuh pūrī milkiyat kā mālik hai. ² Bāp kī taraf se muḡarrar kī huī umr tak dūsre us kī dekh-bhāl karte aur us kī milkiyat sanbhālte haiñ. ³ Isi tarah ham bhī jab bachche the duniyā kī kuwwatoñ ke ḡhulām the. ⁴ Lekin jab muḡarrarā waqt ā gayā to Allāh ne apne Farzand ko bhej diyā. Ek aurat se paidā ho kar wuh sharīat ke tābe huā ⁵ tāki fidyā de kar hameñ jo sharīat ke tābe the āzād kar de. Yoñ hameñ Allāh ke farzand hone kā martabā milā hai.

⁶ Ab chūñki āp us ke farzand haiñ is lie Allāh ne apne Farzand ke Rūh ko hamāre diloñ meñ bhej diyā, wuh Rūh jo “Abbā” yāñī “Ai Bāp” kah kar pukārtā rahtā hai. ⁷ Ḡharz ab āp ḡhulām na rahe balki beṭe kī haisiyat rakhte haiñ. Aur beṭā hone kā yih matlab hai ki Allāh ne āp ko wāris bhī banā diyā hai.

Paulus kī Galatiyoñ ke lie Fikr

⁸ Māzī meñ jab āp Allāh ko nahīñ jānte the to āp un ke ḡhulām the jo haqīqat meñ Ḳhudā nahīñ haiñ. ⁹ Lekin ab āp Allāh ko jānte haiñ, balki ab Allāh ne āp ko jāñ liyā hai. To phir āp muḡ kar in kamzor aur ḡhaṭiyā usūloñ kī taraf kyoñ wāpas jāne lage haiñ? Kyā āp dubārā in kī ḡhulāmī meñ ānā chāhte haiñ? ¹⁰ Āp baṛī fikrmandī se ḡhās din, māh, mausam aur sāl manāte haiñ. ¹¹ Mujhe āp ke bāre meñ ḡar

hai, kahĩn merĩ āp par mehnat-mashaqqat zāe na jāe.

¹² Bhāiyo, main āp se iltijā kartā hūn ki merĩ mānind ban jāeñ, kyoñki main to āp kī mānind ban gayā hūn. Āp ne mere sāth koĩ g̃halat sulūk nahĩn kiyā. ¹³ Āp ko mālūm hai ki jab main ne pahlī dafā āp ko Allāh kī k̃hushk̃habrī sunāi to is kī wajah mere jism kī kamzor hālat thī. ¹⁴ Lekin agarche merĩ yih hālat āp ke lie āzmāish kā bāis thī to bhī āp ne mujhe haqīr na jānā, na mujhe nīch samjhā, balki āp ne mujhe yoñ k̃hushāmdīd kahā jaisā ki main Allāh kā koĩ farishtā yā Masīh Īsā k̃hud hūn. ¹⁵ Us waqt āp itne k̃hush the! Ab kyā huā hai? Main gawāh hūn, us waqt agar āp ko mauqā miltā to āp apnī āñkheñ nikāl kar mujhe de dete. ¹⁶ To kyā ab main āp ko haqīqat batāne kī wajah se āp kā dushman ban gayā hūn?

¹⁷ Wuh dūsre log āp kī dostī pāne kī pūrī jidd-o-jahd kar rahe haiñ, lekin un kī nīyat sāf nahĩn hai. Bas wuh āp ko mujh se judā karnā chāhte haiñ tāki āp unhĩn ke haq meñ jidd-o-jahd karte raheñ. ¹⁸ Jab log āp kī dostī pāne kī jidd-o-jahd karte haiñ to yih hai to thīk, lekin is kā maqsad achchhā honā chāhie. Hāñ, sahīh jidd-o-jahd har waqt achchhī hotī hai, na sirf is waqt jab main āp ke darmiyān hūn. ¹⁹ Mere pyāre bachcho! Ab main dubārā āp ko janm dene kā-sā dard mahsūs kar rahā hūñ aur us waqt tak kartā rahūngā jab tak Masīh āp meñ sūrat na pakare. ²⁰ Kāsh main us waqt āp ke pās hotā tāki farq andāz meñ āp se bāt kar saktā, kyoñki

main̄ āp ke sabab se baṛī uljhan meñ hūn!

Hājirā aur Sārā kī Misāl

²¹ Āp jo shariyat ke tābe rahnā chāhte haiñ mujhe ek bāt bataēñ, kyā āp wuh bāt nahīn sunte jo shariat kahtī hai? ²² Wuh kahtī hai ki Ibrāhīm ke do beṭe the. Ek launḍī kā beṭā thā, ek āzād aurat kā. ²³ Launḍī ke beṭe kī paidāish hasb-e-māmūl thī, lekin āzād aurat ke beṭe kī paidāish ḡhairmāmūlī thī, kyoñki us meñ Allāh kā wādā pūrā huā. ²⁴ Jab yih kināyatan samjhā jāe to yih do ḡhawātīn Allāh ke do ahdōñ kī numāindagī kartī haiñ. Pahlī ḡhātūn Hājirā Sīnā Pahār par bandhe hue ahd kī numāindagī kartī hai, aur jo bachche us se paidā hote haiñ wuh ḡhulāmī ke lie muḡarrar haiñ. ²⁵ Hājirā jo Arab meñ wāḡe pahār Sīnā kī alāmat hai maujūdā shahr Yarūshalam se mutābiḡat rakhtī hai. Wuh aur us ke tamām bachche ḡhulāmī meñ zindagī guzārte haiñ. ²⁶ Lekin āsmānī Yarūshalam āzād hai aur wuhī hamārī māñ hai. ²⁷ Kyoñki kalām-e-muḡaddas meñ likhā hai,

“Ḳhush ho jā, tū jo beaulād hai,
jo bachche ko janm hī nahīn de saktī.

Buland āwāz se shādiyānā bajā,
tū jise paidāish kā dard na huā.

Kyoñki ab tark kī huī aurat ke bachche
shādīshudā aurat ke bachchoñ se zyādā haiñ.”

²⁸ Bhāiyo, āp Is'hāḡ kī tarah Allāh ke wāde ke farzand haiñ. ²⁹ Us waḡt Ismāīl ne jo hasb-e-māmūl paidā huā thā Is'hāḡ ko satāyā jo Rūhul-quḡs kī quḡdrat se paidā huā thā. Āj bhī aisā hī hai. ³⁰ Lekin kalām-e-muḡaddas meñ kyā

farmāyā gayā hai? “Is launḍī aur is ke beṭe ko ghar se nikāl deñ, kyonki wuh āzād aurat ke beṭe ke sāth wirsā nahīñ pāegā.” ³¹ Ġharz bhāiyo, ham launḍī ke farzand nahīñ haiñ balki āzād aurat ke.

5

Apnī Āzādī Mahfūz Rakheñ

¹ Masīh ne hameñ āzād rahne ke lie hī āzād kiyā hai. To ab qāym raheñ aur dubārā apne gale meñ ġhulāmī kā juā ḍālne na deñ.

² Sunen! Maiñ Paulus āp ko batātā hūñ ki agar āp apnā khatnā karwāeñ to āp ko Masīh kā koī faydā nahīñ hogā. ³ Maiñ ek bār phir is bāt kī tasdiq kartā hūñ ki jis ne bhī apnā khatnā karwāyā us kā farz hai ki wuh pūrī shariyat kī pairawī kare. ⁴ Āp jo shariyat kī pairawī karne se rāstbāz bananā chāhte haiñ āp kā Masīh ke sāth koī wāstā na rahā. Hāñ, āp Allāh ke fazl se dūr ho gae haiñ. ⁵ Lekin hameñ ek farq ummīd dilāi gai hai. Ummīd yih hai ki Ķhudā hī hameñ rāstbāz qarār detā hai. Chunāñche ham Rūhul-quds ke bāis imān rakh kar isi rāstbāzī ke lie tarapte rahte haiñ. ⁶ Kyonki jab ham Masīh Īsā meñ hote haiñ to khatnā karwāne yā na karwāne se koī farq nahīñ partā. Farq sirf us imān se partā hai jo muhabbat karne se zāhir hotā hai.

⁷ Āp imān kī dauṛ meñ achchhī taraqqī kar rahe the! To phir kis ne āp ko sachchāi kī pairawī karne se rok liyā? ⁸ Kis ne āp ko ubhārā? Allāh to nahīñ thā jo āp ko bulātā hai. ⁹ Dekheñ, thoṛā-sā khamīr tamām gundhe hue āṭe ko khamīr kar

detā hai. ¹⁰ Mujhe Ḳhudāwand meñ āp par itnā etamād hai ki āp yihī soch rakhte haiñ. Jo bhī āp meñ afrā-tafrī paidā kar rahā hai use sazā milegī.

¹¹ Bhāiyo, jahān tak merā tālluq hai, agar main yih paighām detā ki ab tak ḳhatnā karwāne kī zarūrat hai to merī izārasānī kyon ho rahī hotī? Agar aisā hotā to log Masīh ke maslūb hone ke bāre meñ sun kar ṭhokar na khāte. ¹² Behtar hai ki āp ko pareshān karne wāle na sirf apnā ḳhatnā karwāen balki ḳhoje ban jāen.

¹³ Bhāiyo, āp ko āzād hone ke lie bulāyā gayā hai. Lekin ḳhabardār raheñ ki is āzādī se āp kī gunāhālūdā fitrat ko amal meñ āne kā mauqā na mile. Is ke bajāe muhabbat kī rūh meñ ek dūsre kī ḳhidmat kareñ. ¹⁴ Kyonki pūrī shariāt ek hī hukm meñ samāi huī hai, “Apne paṛosī se waisī muhabbat rakhnā jaisī tū apne āp se rakhtā hai.” ¹⁵ Agar āp ek dūsre ko kātṭe aur phārte haiñ to ḳhabardār! Aisā na ho ki āp ek dūsre ko ḳhatm karke sab ke sab tabāh ho jāen.

Rūhul-quds aur Insānī Fitrat

¹⁶ Main to yih kahtā hūñ ki Rūhul-quds meñ zindagī guzāreñ. Phir āp apnī purānī fitrat kī ḳhāhishāt pūrī nahīn kareñge. ¹⁷ Kyonki jo kuchh hamārī purānī fitrat chāhtī hai wuh us ke ḳhilāf hai jo Rūh chāhtā hai, aur jo kuchh Rūh chāhtā hai wuh us ke ḳhilāf hai jo hamārī purānī fitrat chāhtī hai. Yih donoñ ek dūsre ke dushman haiñ, is lie āp wuh kuchh nahīn kar

pāte jo āp karnā chāhte haiṅ. ¹⁸ Lekin jab Rūhul-quds āp kī rāhnumāī kartā hai to āp sharīat ke tābe nahīn hote.

¹⁹ Jo kām purānī fitrat kartī hai wuh sāf zāhir hotā hai. Masalan zinākārī, nāpākī, aiyāshī, ²⁰ butparastī, jādūgarī, dushmanī, jhagarā, hasad, ḡhussā, ḡhudḡharzī, anban, pārtībāzī, ²¹ jalan, nashābāzī, rangraliyān waḡhairā. Maiṅ pahle bhī āp ko āḡāh kar chukā hūn, lekin ab ek bār phir kahtā hūn ki jo is tarah kī zindagī guzārte haiṅ wuh Allāh kī bādshāhī mīrās meṅ nahīn pāeṅge.

²² Rūhul-quds kā phal farq hai. Wuh muhabbat, ḡhushī, sulah-salāmatī, sabr, mehrbānī, nekī, wafādārī, ²³ narmī aur zabt-e-nafs paidā kartā hai. Sharīat aisī chīzoṅ ke ḡhilāf nahīn hotī. ²⁴ Aur jo Masīh Īsā ke haiṅ unhoṅ ne apnī purānī fitrat ko us kī raḡhbatōṅ aur burī ḡhāhishōṅ samet maslūb kar diyā hai. ²⁵ Chūnki ham Rūh meṅ zindagī guzārte haiṅ is lie āeṅ, ham qadam baqadam us ke mutābiq chalte bhī raheṅ. ²⁶ Na ham maḡhrūr hoṅ, na ek dūsre ko mushta'il kareṅ yā ek dūsre se hasad kareṅ.

6

Ek Dūsre ke Bojh Uṭhānā

¹ Bhāiyo, agar koī kisī gunāh meṅ phaṅs jāe to āp jo ruhānī haiṅ use narmdilī se bahāl kareṅ. Lekin apnā bhī ḡhayāl rakheṅ, aisā na ho ki āp bhī āzmāish meṅ phaṅs jāeṅ. ² Bojh uṭhāne meṅ ek dūsre kī madad kareṅ, kyoṅki is tarah āp Masīh kī sharīat pūrī kareṅge. ³ Jo samajhtā hai

ki main kuchh hūn agarche wuh haqīqat meñ kuchh bhī nahīn hai to wuh apne āp ko fareb de rahā hai. ⁴ Har ek apnā zātī amal parkhe. Phir hī use apne āp par faḡhr kā mauqā hogā aur use kisī dūsre se apnā muwāzanā karne kī zarūrat na hogī. ⁵ Kyoñki har ek ko apnā zātī bojh uḡhānā hotā hai.

⁶ Jise kalām-e-muqaddas kī tālīm dī jāti hai us kā farz hai ki wuh apne ustād ko apnī tamām achchhī chīzoñ meñ sharīk kare.

⁷ Fareb mat khānā, Allāh insān ko apnā mazāq uḡrāne nahīn detā. Jo kuchh bhī insān botā hai usī kī fasal wuh kāṭegā. ⁸ Jo apnī purānī fitrat ke khet meñ bīj boe wuh halākat kī fasal kāṭegā. Aur jo Rūhul-quds ke khet meñ bīj boe wuh abadī zindagī kī fasal kāṭegā. ⁹ Chunāñche ham nek kām karne meñ bedil na ho jāeñ, kyoñki ham muqarrarā waqt par zarūr fasal kī kaṭāi kareñge. Shart sirf yih hai ki ham hathiyār na ḡāleñ. ¹⁰ Is lie āeñ, jītnā waqt rah gayā hai sab ke sāth nekī kareñ, ḡhāskar un ke sāth jo īmān meñ hamāre bhāi aur bahneñ haiñ.

Āḡhirī Āgāhī aur Salām

¹¹ Dekheñ, main baṛe baṛe hurūf ke sāth apne hāth se āp ko likh rahā hūn. ¹² Yih log jo duniyā ke sāmne izzat hāsīl karnā chāhte haiñ āp ko ḡhatnā karwāne par majbūr karnā chāhte haiñ. Maqsad un kā sirf ek hī hai, ki wuh us īzārasānī se bache raheñ jo tab paidā hotī hai jab ham Masīh kī salībī maut kī tālīm dete haiñ. ¹³ Bāt yih hai ki jo apnā ḡhatnā karāte haiñ wuh ḡhud sharīat kī pairawī nahīn karte. To bhī yih chāhte

haiñ ki āp apnā khatnā karwāeñ tāki āp ke jism kī hālat par wuh faḡhr kar sakeñ. ¹⁴ Lekin Ḳhudā kare ki maiñ sirf hamāre Ḳhudāwand Īsā Masīh kī salīb hī par faḡhr karūñ. Kyoñki us kī salīb se duniyā mere lie maslūb huī hai aur maiñ duniyā ke lie. ¹⁵ Ḳhatnā karwāne yā na karwāne se koī farq nahīñ paṛtā balki farq us waqt paṛtā hai jab Allāh kisī ko nae sire se ḡhalaq kartā hai. ¹⁶ Jo bhī is usūl par amal karte haiñ unheñ salāmatī aur rahm hāsil hotā rahe, unheñ bhī aur Allāh kī qaum Isrāīl ko bhī.

¹⁷ Āindā koī mujhe taklīf na de, kyoñki mere jism par zaḡhmoñ ke nishān zāhir karte haiñ ki maiñ Īsā kā ḡhulām hūñ.

¹⁸ Bhāiyo, hamāre Ḳhudāwand Īsā Masīh kā fazl āp kī rūh ke sāth hotā rahe. Āmīn.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-30

PDF generated using Haiola and XeLaTeX on 22 Feb 2024 from source files dated 13 Dec 2023

123ff8cb-27b3-5817-a02a-22e67145fd30